

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst («Službene novine Zeničko-dobojskog kantona, broj: 7/10), a u skladu sa Programom utroška budžetskih sredstava u 2016. godini, usvojenim Zaključkom Vlade Zeničko-dobojskog kantona, broj: 02-14-10281/16 od 20.05.2016. godine, Vlada Zeničko-dobojskog kantona, na prijedlog Ministarstva za privredu, na 56. sjednici, održanoj 20.05.2016. godine, d o n o s i

ZAKLJUČAK

I.

Daje se saglasnost na Uputstvo o postupku i kriterijima za odobravanje i dodjelu (refundaciju) sredstava poticaja namijenjenih za subvencioniranje troškova jačanja konkurentnosti, koje čini sastavni dio ovog Zaključka.

II.

Za realizaciju poticaja iz tačke I. zadužuje se Ministarstvo za privredu, koje će donijeti sve provedbene akte i imenovati Komisiju za provođenje propisanog postupka.

III.

Zaključak stupa na snagu danom donošenja.

Broj: 02-_____/16.

Datum, 20.05.2016. godine

Z e n i c a

PREMIJER

Miralem Galijašević

DOSTAVLJENO:

1x Ministarstvo za privredu

1x Ministarstvo finansija

1x a/a.

Bosna i Hercegovina
Federacija Bosne i Hercegovine
ZENIČKO-DOBOJSKI KANTON

MINISTARSTVO ZA PRIVREDU/GOSPODARSTVO



Bosnia and Herzegovina
Federation of Bosnia and Herzegovina
ZENICA-DOBOJ CANTON
MINISTRY OF ECONOMY

**UPUTSTVO
O POSTUPKU I KRITERIJIMA ZA ODOBRAVANJE I DODJELU
(REFUNDACIJU) SREDSTAVA POTICAJA NAMIJENJENIH ZA
SUBVENCIONIRANJE TROŠKOVA JAČANJA KONKURENTNOSTI**

Zenica, maj 2016. godine

Na osnovu člana 56. i 66. stav 2. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05), ministar Ministarstva za privredu Zeničko-dobojskog kantona, uz saglasnost Vlade Zeničko-dobojskog kantona, donosi:

**UPUTSTVO
O POSTUPKU I KRITERIJIMA ZA ODOBRAVANJE I DODJELU
(REFUNDACIJU) SREDSTAVA POTICAJA NAMIJENJENIH ZA
SUBVENCIONIRANJE TROŠKOVA JAČANJA KONKURENTNOSTI**

1. UVOD

Privredni subjekti iz Zeničko-dobojskog kantona su duži niz godina svoju poslovnu orijentaciju usmjerili ka povećanju kvaliteta izvoza svojih proizvoda. Zbog toga su pokazatelji vanjskotrgovinske razmjene Zeničko-dobojskog kantona daleko najbolji u Federaciji Bosne i Hercegovine, te je posljednjih godina evidentiran suficit. Međutim, bitno je istaći da je ovaj rezultat postignut uz ogromne napore, kako proceduralne, tako i materijalne.

Zbog globalne ekonomske krize, značajnih poticaja koje konkurentske zemlje realiziraju prema svojim privrednim subjektima, privredni subjekti iz Zeničko-dobojskog kantona su na ino tržištu pod izuzetnim pritiskom.

Imajući u vidu naprijed navedeno, ukazala se potreba za dizajniranje ovog poticaja i subvencioniranje dijela troškova usmjerenih za jačanje konkurentnosti privrednih subjekata, izvoznika, iz Zeničko-dobojskog kantona.

Na ovaj način bit će smanjeni troškovi jačanja konkurentnosti pozicije privrednih subjekata (povećanje efikasnosti, jačanje tehnološke baze, modernizacija poslovnog procesa, te stvaranje novih radnih mjesta).

2. CILJ POTICAJA

Cilj ovog projekta je smanjenje troškova, povećanja konkurentnosti, intenziviranje zapošljavanja i razvoja privrednih subjekata iz Zeničko-dobojskog kantona.

3. KORISNICI POTICAJA

U duhu ovog Postupka i kriterija, korisnici poticaja su privredni subjekti iz područja prerađivačkih djelatnosti (A, B, C, D- Standardna klasifikacija djelatnosti) registrovani u Zeničko-dobojskom kantonu, sa maksimalnim ukupnim prihodom za prethodnu godinu u iznosu do 7.000.000,00 KM i realiziranim izvozom za prethodnu godinu.

Jedan korisnik poticaja može koristiti najviše dvije vrste poticaja Ministarstva za privredu u tekućoj budžetskoj godini, ali pod uslovom da ukupno dobijeni iznos ne prelazi 50.000,00 KM. Korisnik poticaja može koristiti poticaj samo u jednom ministarstvu Zeničko-dobojskog kantona.

4. IZNOS POTICAJA

Sredstva za subvencioniranje troškova jačanja konkurentnosti obezbjeđuju se Budžetom Zeničko-dobojskog kantona i planiraju Programom utroška sredstava Ministarstva za privredu, te odgovarajućom Odlukom Vlade Kantona, zbirno za sve podnosiocje zahtjeva.

Vlada Kantona subvencionira (refundira) dio troškova za privredne subjekte registrovane na području Zeničko-dobojskog kantona, u iznosu od 3% od fakturisanog iznosa izvoza, u KM, u prethodnoj godini, ali ne više od 25.000,00 KM po godini.

5. ZAHTJEV ZA ODOBRAVANJE POTICAJA

Uredan Zahtjev za odobravanje (refundaciju) sredstava poticaja, privredni subjekt je dužan podnijeti Ministarstvu za privredu.

U razmatranje će se uzeti samo zahtjevi koji budu podneseni u roku od 60 (šezdeset) dana od dana objavljivanja Javnog poziva.

Uz zahtjev privredni subjekt dostavlja sljedeće priloge:

- Original ili ovjerenu kopiju Bilansa stanja i Bilansa uspjeha za prethodnu godinu;
- Original ili ovjerenu kopiju Uvjerenja o izvršenom izvozu proizvoda sa BH porijeklom, izdatog od Uprave za indirektno oporezivanje Bosne i Hercegovine;
- Original ili ovjerenu kopiju Odobrenja za obavljanje proizvodne djelatnosti ili odgovarajući akt nadležnog inspekcijskog organa, ili Obavještenje o razvrstavanju privrednog subjekta prema djelatnosti - izdatog od Federalnog zavoda za statistiku;
- Original ili ovjerenu kopiju uvjerenja o uredno izmirenim javnim prihodima - ne starije od 60 dana u odnosu na dan podnošenja zahtjeva;
- Original ili ovjerenu kopiju uvjerenja o uredno izmirenim indirektnim porezima - ne starije od 60 dana u odnosu na dan podnošenja zahtjeva;
- Original ili ovjerenu kopiju Uvjerenja o uredno izmirenim finansijskim obavezama prema Budžetu Zeničko-dobojskog kantona, ne starije od 60 dana u odnosu na dan podnošenja zahtjeva;
- Uvjerenje komercijalne banke da je žiro račun izvoznika aktivan, ne starije od 60 dana u odnosu na dan podnošenja zahtjeva.;
- Original ili ovjerenu kopiju Certifikata o BH porijeklu proizvoda sa JCI deklaracije izdat od Vanjsko-trgovinske komore Bosne i Hercegovine.

6. KOMISIJSKA OCJENA

Komisiju za ocjenu ispunjenja uvjeta i kriterija za dodjelu poticajnih sredstava imenuje i razrješava ministar u Ministarstvu za privredu. Za svoj rad ova komisija odgovara ministru Ministarstva za privredu.

Komisija razmatra Zahtjeve investitora, te cijeni ispunjenost uslova i kriterija za odobravanje sredstava.

Izvještaj, Komisija dostavlja ministru Ministarstva za privredu, koji će biti objavljen na web stranici Vlade Kantona.

7. POSTUPAK ODOBRAVANJA

Na osnovu Izvještaja Komisije, Ministarstvo za privredu predlaže Vladi Kantona donošenje Odluke o odobravanju poticajnih sredstava. Zbirnu odluku Vlada donosi shodno raspoloživim sredstvima za tekuću godinu.

Na početku svake godine Vlada Kantona odlučuje o nastavku dodjele ovih poticaja općenito, shodno projekciji budžetskih rashoda za tekuću godinu, o čemu donosi Zaključak o usvajanju Programa utroška sredstava u Ministarstvu za privredu.

8. REFUNDACIJA SREDSTAVA – REALIZACIJA POTICAJA

Na osnovu Odluke o odobravanju sredstava Ministarstvo za privredu podnosi Nalog za isplatu sredstava Ministarstvu finansija.

9. RANIJE VAŽEĆI AKTI, KRITERIJI I POSTUPCI

Ovim aktom stavljaju se van snage i prestaju vrijediti svi raniji akti kojima su propisivani prethodno važeći kriteriji i postupci te utvrđivane nadležnosti u odobravanju i realizaciji ovog Vladinog programa poticaja.

Broj: 04-14- /16
Zenica, 16.05.2016. godine

MINISTAR

Zvonimir Andelić dipl.ing.grad.